

Siunnersuummut nassuiaatit

Nassuiaatit nalinginnaasut

1. Siunnersuutip tunuliaqtaa

Naalackersuinikkut pissutsit massakkut atuuttut aallaavigalugit siunnersuut saqqummiunneqarpoq. Tamatuma saniatigut saqqummiussisutissaq innersuussutigineqarpoq.

2. Siunnersuutip imarisai

Siunnersuutip kingunerisaanik Inatsisartunut nutaamik ulloq 11. Marts 2025 qinersisoqassaaq. Tassunga atatillugu inatsillu akuerineqarnissaata tungaanut Naalackersuisuugallartut qinersisoqareerpallu Naalackersuisunngortut atorsinnaasassaani piginnaatitsissutit arlallit siunnersuutigineqarput. Nunani allani naalackersuinikkut pissutsit iliuseqarfigisinnaanissaat aammalu sanaartugassatut pilersaarutit aalajangiiffigineqartarnissaat eqqarsaatigalugit Naalackersuisuugallartunut piginnaatitsissutinik tunniussinissaq pisariaqarpoq.

3. Pisortanut aningaasaqarnikkut allaffissornikkullu kingunerisassat

Siunnersuut pisortanut aningaasatigut allaffissornikkullu sunniuteqartussaangitsutut nalilerneqarpoq partiit qineqqusaarnissaanut aningaasartuutissat (Konto pingaarneq 31.08.34) aamma qinersinerup ingerlanneqarnissaanut aningaasartuutissat (konto pingaarneq 31.08.34) 2025-imut Aningaasanut inatsimmi ilanngullugit missingersuusiarineqareersimmata.

4. Inuussutissarsiortunut aningaasaqarnikkut allaffissornikkullu kingunerisassat

Inuiaqatigiinni aningaasarsiorneq qinersinerup nalaanni qaangiuteqqittussatut unikaallassinnaavoq, Naalackersuisuugallartut atorfilittat suliassaasa ingerlaannarnissaanut pisariaqartunik taamaallaat nalinginnaasumik suliqaarsinnaatitaasarmata. Inatsisartut Naalackersuisullu pillugit Inatsisartut inatsisaanni § 29 malinneqarpoq. Taamaasiornikkut soorlu aningaasaliissutaasimasut atorneqarnissaat Naalackersuisunngortussat isummerfigineqarnissaat qulakkeerneqassaaq.

Naalackersuisuugallartup sanaartugassanik naammassillugit pilersaarusioreneqareersimasunik 2025-mut Aningaasanut Inatsit aqqutigalugu aningaasaliiffigineqareersimasunik aalajangersimasunik piumasaqaateqarluni suliarinnittussarsiorlunilu isumaqatigiissuteqarsinnaanissaanik siunnersuut imaqarpoq. Taamaasiornikkut qinersisoqalerneratigut sanaartugassat kinguaatoornerisigut aningaasatigut annaasat suliffissaaleqinerillu pilersartut inuiaqatigiinnut ajoqutaasartut qaangerneqarsinnaassapput.

5. Avatangiisinut, pinngortitamut inuillu peqqissusaannut kingunerisassat

Siunnersuut avatangiisinut, pinngortitamut inuillu peqqissusiannut sunniuteqassangatinneqanngilaq.

6. Innuttaasunut kingunerisassat

Siunnersuut innuttaasunut allaffissornikkut sunniuteqassangatinneqanngilaq.

7. Kingunerisassat pingaarnerit allat

Siunnersuutip annertunerusunik kinguneqarnissaa naatsorsuutigineqanngilaq.

8. Tusarniaaneq

Qinersinissap nalunaarutigineqarneranut atatillugu tusarniaasarneq ileqqunngimmat tusarniaasoqarsimannngilaq.

Inatsisissatut siunnersuummi aalajangersakkanut ataasiakkaanut nassuiaatit

§ 1-mut

Inatsisartunut qinersisarneq Pillugu Inatsisartut inatsisaat naapertorlugu Inatsisartunut ilaasortat ukiunut sisamanut qinigaasarpud, ilaasortallu tamarmik ataatsikkut tunuarterlutik. Piffissaq qinigaaffiusoq ullormi qinigaaffimmiit naatsorsorneqartarpoq. Inatsisartunut qinersineq kingulleq 6. april 2021 pimmat, qinersinissaq kingusinnerpaamik 6. april 2025 pissaaq.

Immikkut ittumik Inatsisartunut ulloq 11. marts 2025 qinersisoqarnissaa siunnersuutigineqarpoq. Taamaalilluni qinersinerup akuersissutigineqarneraniit qinersinissamat sapaatip akunneri tallimanik sivisussuseqassaaq.

Ullussaata aalajangersarneqarnerani pingaartumik qinersinermut inatsimmi piffissamat killissaliussat, qinersinissap piareersarneqarneranut atatillugu malinneqartussat eqqarsaatigineqarput, taamatullu qinersinerup piareersarneqarnissaanut tunngatillugu suliarineqartussat sillimaffigineqarlutik.

§ 2-mut

Siunnersuutip malitsigisaanik inatsisartunut nutaamik qinersinissami Inatsiartunut qinersisarneq pillugu Inatsisartut inatsisaat malinneqartussanngusaaq Inatsisartut inatsisaani §§ 28-33, qarasaasiakkut allakkatigut taasinernut tunngassuteqartut sulilu atuutsilersinneqarsimanngitsut minillugit.

Siunnersuummi imm. 2 kingunerivaa partiit nutaat kingusinnerpaamik nalunaartussaanut sapaatip akunneri tallimaasut qinersinermut qaninnerulersinneqarnera. Taamaaliornikkut partiit atsiornernik katersisimasut pitsaanerpaamik nalunaarnissamat periarfissikkusunneqarput.

§ 3-mut

Nunap naalagaaffiulluunniit nunani allani naalackersuinikkut imaluunniit aningaasaqarnikkut soqutigisai, tamakkununga ilanngullugit Kunneqarfik Danmarkimut ataqateqarneq, naalagaaffinnut allanut pissaanilinnut imaluunniit naalagaaffiit assigiinngitsut soqutigisaannut tunngasut eqqarsaatigalugit isumaqatiginninniarnissamat kinguartinneqarsinnaanngitsumut pisinnaatinneqarnissaat siunnersuutigineqarpoq (nr. 1),

pisinnaatitsissutit taamaattut naapertorlugit kinguartinneqarsinnaanngitsunik isumaqatiginninniarnissamut (nr. 2) kiisalu pisinnaatitsissutit taamaattut naapertorlugit isumaqatiginninniarnierit kinguartinneqarsinnaanngitsut naammassinissaannut (nr. 3), taamaakkaluartoq naammassininneq inatsisit inuiannut tamanut tunngasut naapertorlugit isumaqatigiissusiornermik Kalaallit Nunaanni Namminersorneq pillugu inatsimmi Kapitali 4-mi pineqartumik kinguneqassanngilaq. Matumani qulakkeerneqassaaq Naalakkersuisut piffissami atuuffianni Kalaallit Nunaat pissaanilinnut allanut il. il. atatillugu inatsisitigut pituttorneqannginnissaa. Tassunga taarsiullugu Inatsisartunut qinigaarlaat Naalakkersuisullu toqqarneqartut inatsisit inuiannut tamanut tunngasut naapertorlugit isumaqatigiissusiornissamut inaarutaasunik aalajangiissapput. Pissutsinili kinguartinneqarsinnaanngitsuni inatsisit inuiannut tamanut tunngasut naapertorlugit isumaqatigiissusiortoqarsinnaassaaq inatsisitigut nangaassutissaqartillugu, soorlu atuutsitsilernerme nangaassut qinersereernerup kingorna naalakkersuinikkut isummersinnaatitsisoq, tassa Kalaallit Nunaat isumaqatigiissutip isumaqatigiissutigineqarnerata nalaani pissaanilinnut allanut atatillugu inatsisitigut pituttorsinnaajunnaarlugu.

Nr. 1-3 naapertorlugit pisinnaatitsissutit ikinnerpaamik partiit siulittaasuinit pingasunit akuerineqarsimassapput, taakkulu Inatsisartuni ilaasortaajunnaartunik ikinnerpaamik 2/3-iinik sinniisoqassallutik. Taamaaliornikkut Naalakkersuisut nunanut allanut tunngatillugu isumaqatiginninniarnernik suliaqarnissamut naalakkersuinikkut tunuliaqutserluarneqassapput.

Isumaqatiginninniarnarluni sulinerit tamarmik Inatsisartut Naalakkersuisullu pillugit Inatsisartut inatsisaanni § 29-mi tunngavissat tunngavigalugit ingerlassapput, Naalakkersuisuugallartut atorfilittat suliaassaasa ingerlaannarnissaannut pisariaqartunik taamaallaat nalinginnaasumik suliaqarsinnaatitaasarnerat ataqqillugu. Pisinnaatitsissut soorunami killilimmik oqaasertaalu qaangernagit atorneqassaaq.

§ 4-mut

Siunnersuutigineqarpoq Naalakkersuisuugallartut sanaartornissamut suliniutinut pilersaarusiatalugit naammasseriikkanut 2025-mullu Aningaasaqarnermut Inatsimmi pisariaqartinneqartunik aningaasanik immikkoortitsivigineqareersimasunut suliarinnittussarsiornissamut isumaqatigiissusiornissamullu pisinnaatinneqassasut. Pisinnaatitsinermut tunngaviuvoq, taamatut pisoqanngippat inuiaqatigiinnut ajoqutaasinnaammat, matumani ilanngullugit nunatta karsianut suleqatigisamulluunniit namminersortumut aningaasaqarnikkut kingunerluutit, imaluunniit suliffissaaleqinerutitsineq sanaartornissamulluunniit suliniutinik kinguaattoorneq.

Pisinnaatitsinermut piumasaqaataavortaaq ikinnerpaamik partiit siulittaasuinit pingasunit akuersisimassasut taakkulu Inatsisartuusimasuni ikinnerpaamik 2/3-iinik amerlassuseqassallutik. Taamaaliornikkut maanna Naalakkersuisuugallartut sanaartornermi

suliaat naalakkersuinikkut taparserneqarnissaat qulakkeerneqassaaq.

Pisinnaatitsissut Inatsisartut Naalakkersuisullu pillugit Inatsisartut inatsisaanni § 29-mi tunngavissat tunngavigalugit atorneqassaaq, Naalakkersuisuugallartut atorfilittat suliassaasa ingerlaannarnissaannut pisariaqartunik taamaallaat nalinginnaasumik suliaqarsinnaatitaasarnerat ataqqillugu. Pisinnaatitsissut soorunami killilimmik oqaasertaalu qaangernagit atorneqassaaq.

§ 5-imut

Inatsisartut inatsisaata ullup saqqummiunneqarfiata aqaguani atortuulernissaa siunnersuutigineqarpoq.

Inatsip Inatsisartuni inaarutaasumik akuerineqarnera aallarnerfigalugu Naalakkersuisut pisarnermisut ingerlatsiinnassapput. Taamaakkaluartoq inatsimmi §§ 3-mi aamma 4-mi pisinnaatitsissutit aatsaat inatsip atuutilerfiata kingorna atorneqarsinnaalissapput.